

KTP Rorel Inkhawm
hu a tum khatna
a tan Aizawi
khaupawnsa ngah
nin Lungleia an
thleng dawn a
Lawngtainoah / hre
eng ang u.

KRISTIAN THALAI

February
2013



Kristian Thalai Pâwl Chanchinbu Thla tin chhuak Vol IV No. 12

GOOD DISCIPLE

- Good Disciple
- KTP Hruaitu leh a nupui
- Rorel Inkhawma bial aiawh thlenna tur
- Hlau suh ka awmpui che
- Thimhlim mumang
- Hlawhtlinna
- Kuhva min lo theh
- Hruaitu chanchin



**KTP Rorel Inkhawm neihna hmun tur
Lunglei Chanmari Kohhran Biak In**



Editor :

R. Lalhmingthanga

Joint Editors :

TUPa Lalhruaizela

Pu Lalmuanpuia Hrahse

TUPa Lalremsiam

Dr.H.Lalthanzara

Manager :

Lalmuanpuia

A lak man :

Kum khatah - Rs. 60.00

Copy khat - Rs. 5.00

*Thu chhuah tūr nei chuan
Editor, Kristian Ṭhalai, Synod
Office-ah thawn tūr a ni a; a la
duh chuan KṬP Office-ah a man
pêk lâwk a ngai.*

Office Phone : 2326372/2335821

Visit us : cktp.blogspot.com

email : kristianthalai@yahoo.com

like us @ www.facebook.com/centralktp

KRISTIAN ṬHALAI PAWL

Thupui

Rawngbawl tūra chhandam

Thupui inngahna

Ephesi 2:10 Thil ṭha ti atán Krista
Isuaah chuan siama awmin, ama
kutchhuak kan ni si a, chu thil ṭha tih
chu kan awmna tūrin Pathianin a
buatsaih lâwk a ni.

Thil tumte

1. Isua Krista rinna leh amah anna
kawnga ṭhalaite hruai.
2. Kohhran kut ke ni tura ṭhalaite
buatsaih.
3. Kohhran hnathawh tihpuitlin.
4. Krista Chanchin Ṭha puan darh.

A CHHUNGA THU AWM

1.	Good Disciple...	2
2.	KṬP Hruaitu leh a nupui...	5
3.	Rorel Inkhawma bial aiawh thlenna tur...	8
4.	Hlausuh ka awmpui che...	10
5.	Thimhlim mumang	13
6.	Hlawhtlinna...	17
7.	Kuhva min lo ṭheh...	19
8.	Hruaitu chanchin	23

Editorial	1	Hringlang tlâng...	25
Rimâwi	26	Hriatzauna	29
Kantu	30	Keimahni	32



MAMAWH TIHTEM

Ni tin khawsakna man lo sang chho zel hian mi tin min nghawng a, mi dang ruala ke pen tur leh mi nuih ruala nui ve thei turin theihtawp kan chhuah thin. Kan ni tin hna leh ruahmanna te Pathian hnena thlen thin hi kan tih tur dik tak a ni a; mahse, Pathian engkim neitu hnena thlen lova mahni remhriat dan zawnga ke pen chiam mai hi thil awm thei a ni. Thalaite hian kan hma lam hun atana ruahmanna kan neih te Pathian hnena thlen hi kan tih tur a ni tih i hre thar leh teh ang.

Beiseina leh thawhrimna tel lo chuan hlawhtlinna a awm thei lo va, mi neih leh hlawhtlinna sawi chhawng ringawta hun hmang lovin mahni kea ding turin tan la thar ila, kan duhzawng leh chakzawng lei emaw neih tum nghal mai lovin kan mamawh em tih hi ngaihtuah hmasak a tha hle. Mamawh leh duh kan ngah tual tual a, Pathian rawngbawla kan chet chhuahna hrang hrangah mamawh kan ngah ta lutuk hian min tibuai ta hle. Kan rawngbawlpuite, kan thenawmte, kan hmelhriatten an neih ang leh an hman ang leh an lei theih ang kha neih ve loh hlau takin harsa chung chung pawha suma lei theih chi a nih phawt chuan neih a, hman ve phet tumin kan buai thin a nih hi. Kawng thenkhatah chuan nun tinuamtu a ni a, nun awlsamna pawh a thlen thin. Mahse, kan chhungkaw fairel bel bakah Kohhran leh khawtlang rawngbawlna, kan ram ei leh bar thlengin a khawih pha tlat bawk si, thalaiten ni tin khawsakna atan kan mamawh tihtlem a tul takzet ta.

Kan ngaihsan zawng leh ngaihlut zawng thlak leh tihdanglam a tul thu kan zir tawh a, a taka kan chetchhuahpui a hun ta hle, tul lo leh ren lo taka sum leh pai te hi kan hmang thin a nih chuan, a rawng kan bawol theihna tura min pek a nih avangin thiam leh renchem taka hman hi kan bat a ni tih hi zir thar leh teh ang. Sum leh pai kan hmuh leh dawn zawng zawngte hi mi mal kan intihropuina tura pek kan ni lo va, a rawngbawol zelna tur atana malsawmna kan dawn a ni tih hi hriat reng a pawimawh hle.

Rinawmna, thuawihna, beiseina, chhelna leh Pathian fihna nena kan ni tin hun hman hi kan tih tur pawimawh tak a ni tih te leh sum leh pai hman chungchang te, ni tin khawsak phung leh rilru puthmang dik zawk te KTP member leh thanghar te zingah infuihin inzirtir thar ila, Pathian kan rinna te, kan Kohhran, khawtlang leh ram hmasawmna te hi thalaiteah a innghat tlat a ni tih vawng rengin hmasawm zel turin ke i pen zel ang u♦

GOOD DISCIPLE

— Rev. R. Lalengzauva,
Zonuam

1. Hnungzuitu, zirtu ni tur hian — kan zirtirtu, kan zuia kha kan hriat chian a ngai.

Krista Pathian nung fapa chu i ni (Mt. 16:16) “Chuvang chuan a ni, heng thil pawh hi ka tuar ni, nimahsela ka zak lo ve, ka rina chu ka hria, a hnena ka kawltir chu....(2 Tim. 1:12).

2. Zuitu tha, zirtu tha ni tur chuan kan zuia duh dan hriat leh zawm a ngai. “Keimahah awm reng rawh u,” (John 15:4). Mi, Lal Isuaa a awm reng chuan khawvel sualnain a hneh ve mai ngai lo va, a nunah thil tha tam tak a lang chhuak zawk thin. Isuaa awm rengte chu Lal Isuan a tanpui ngei bawh thin. Amaha awm reng lote erawh chu peng anga paih chhuah tur leh meia tuah mai tur an ni (Joh. 15:6).

3. Amah hmangaih tak tak tur leh mi dangte pawh hmangaih turin — zuitu disciple chu phut a ni (Joh. 14, 23, 24, Mk. : 12, 29-30).

Lal Isua chuan amah aia hmangaih leh duh ropui zawk neite a lawm lo. Amah hmangaihtu chuan a thenawm

khawvengte, a unaute pawh a hmangaih ngei tur a ni (I Joh. 4:20). Krista hmangaihtute tak tak chuan Lalpa duh zawng eng nge ni tih an ngaihtuah ber tawh thin a ni. Nula, tlangval ten an hmangaih berte duh zawng tih an duh thin ang hian, Lal Isua duh zawng tih a chak thin a ni. Lalpa duh zawng tih chakna kan la neih miah loh chuan amah kan la hmangaih lo tihna a ni.

4. Engkim kalsan leh hrehawm tuar huam a ngai (Mt. 16:24-26)

Mahni duh zawng leh chak zawngte dah lal tawh lovin, Pathian hnenah hlan zawkin, Kan zui Lal Isua tana kan nih nih nih ngam a ngai a ni. “Tu pawhin mi zui a duh chuan mahni hrehawm pawisa lovin ni tin a Kraws puin mi zui rawh se (Lk. 9:23). Krista rin avanga hrehawm tuar, zahna, tlawmna, mualphona, thiam loh channa tawh a ngai fo thin (Phil. 2:5-8). He rilru Krista Isuaa awm bawh kha nangmahniah awm rawh se. Hetiang dinhmuna din hi a ngai fo a ni.

5. Tumruhna leh duhna tak tak a ngai (Lk. 14:28-35).

Tumruhna leh rilru tak taka zuitu ṭha nih kan tum a ṭul a ni.

Good Disciple te nunah hengte hi a lang ṭhin —

1. **Hmangaihna** : Lal Isua leh mi dangteah (Mk. 12:29-31)

2. **Ṭawngṭaina** : (Phil. 4:6)
Bible-a mi ropui leh hmingthangte hi ṭawngṭai ngaina tak vek an ni. Eg. Abraham, Mosia, Nova, Davida, Daniela leh Josepha te ang hi.

3. **Pathian Biak Inkhawm an ngaina** : (Tirh. 2:46)
Zuitu Disciple ṭha chuan Pathian Biak Inkhawm a ngaina ṭhin a, a thlahthlam ngai lo.

I Biak In hun chungkawtlaia nikhat awm hi, ni sangkhat aiin a ṭha zawk si a (Sam 84:110).

4. Rinawmna, huaisenna leh takna hi zuitu tan chuan a pawimawh em em a ni. Heng nunzia tel lo hi chuan zuitu ṭha a nih theih loh. Josepha, Daniela te anga zuitu huaisen leh rinawm nih a ngai. Fiamthu lutuk leh nun ho lutuk lakah pawh fimkhur a ngai.

5. **Thilpek** : Lal Isua zuitu chuan thilpek hi a ngai pawimawh ngei ṭhin.

Tirh. 20:35 Lal Isua thu hre reng chungin mi chak lote in ṭanpui tur a ni. Amah ngeiin “Eng lo lak aiin pekin lukhawng a nei zawk, a tih kha Lk. 6:38. “Pe rawh u, chutichuan pekin in awm ang, ṭhahnemngai taka teha, beng muka, sawi muk a, liam zawih zawihin in mal chungah an pe ang che u” Kan Pathian chu petu, malsawmtu a nih avangin amah betute pawh thilpek pe turin a phut a ni.

6. **Chanchin Ṭha hrilh** : (Mk. 13:10)

Tin, Chanchin Ṭha hi hnam zawng zawng hnenah hrilh hmasak tur a ni (Mk. 16:15). Khawvel zawng zawngah kal ula thil siam zawng zawng hnenah Chanchin Ṭha hi hril rawh u (II Tim. 4:5). Nang erawh chu engkimah fimkhur la, hrehawm tuar la, Chanchin Ṭha hriltu lam hna thawk la, i rawngbawl na kha hlen rawh.

Ringtute chu kan Lal Isuan, khawvel eng, leichi, tlang chungah khaw awm ang tein min tehkhin a, chuvang chuan ringtu kan nihna chu keimahniah miten an hmu thei tur a ni. Aw le, zuitu ṭha awmzia

leh nihna kan sawi ta nual a, zuitu tha kan nih chuan hruaitu tha kan ni nghal dawn tihna a ni. Kohhrana mipui zuitu kan nihnaah pawh hian zuitu tha, mipui tha kan nih chuan hruaitu dinhmuna kan din hunah pawh hruaitu tha kan ni dawn tihna a nih chu. Hruaitu harsa tak kan nih

chuan hruaitu tha pawh kan ni thei ngai lo vang.

KṚP thupui chu
“Rawngbawl tura chhandam”
Thil tha ti atan Krista Isuaah chuan siama awmin, ama kutchhuak kan ni si a, chu thil tha tih chu kan awmna turin Pathianin a buatsaih lawk a ni (Eph. 2:10)



Synod Bookroom lehkhabu thar thenkhatte

1. **Israelte Hruaitu Mosia** : Talent ropui tak nei, zirna tha tak a tanga zir chhuak, a dinhmun danglam tak avanga hna chi hrang hrang thawk, Pathian aiawha Israel-te Aigupta ram a tanga hruai chhuaktu ropui leh Zawnei ropui nih fawm Mosia hian chanchin ngaihnamw a lo ngah ngiang mai! A chinchhuaka chhuitu R. Lalnunenga buatsaih hi lehkhabu bengvarthlak leh ngaihnamw tak a ni. Aman Rs 80/-
2. **Hlimna Hriak** : Chhung Inkhawm kan uar deuh deuh a, chumia hman tur lehkhabu pawh kan nei tha tial tial. Lalengmawia Ralte chuan chhungkaw tin mil, tha zet mai a rawn chhawpchuak ve leh ta. Chhung inkhawm nei thinte tan lehkhabu thar a ni e. A man Rs. 100/-
3. **Zalenna ramah** : He lehkhabu ziaktu T. Sena, Ralte Siakeng hi mi danglam, 'Thil hre thei' kan tihte zinga mi a ni a. Chutiang miin hmanlai Mizo khua leh tui dinhmun leh an hna peng hrang hrang, an in sak dan leh mi lar hrang hrangte chanchin a khungkhawmna lehkhabu hi Mizo hnam chanchin chhua ngaihventute tan puitu tha a tling ngei ang. A man Rs. 100/-
4. **Lungawina Hmasa** : Thawnthu tawi pali - '14th February', 'Hei lo liam', 'Amen' leh 'Vahvaihna khawvel em ni?' tih hmanga Chaltlang nula Marly Zodinpuin Literature lipui a rawn dai tanna hi lehkhabu ziaik tum, ziaik mai hlei thei lote tan chona a tling. A man Rs. 120/-
5. **Presbyterian Kohhran tibauit piantharna theology hi** : Kum 2013 chung hian Nilai zan thupuih, "Presbyterian Kohhran" tih Presbyterian Kohhran chuan kan zir dawn a. Kan thupui zir min pui theitu tur he lehkhabu ziaktu Laldintluanga'n a ziah chhan a sawi chu "He lehkhabu hi Presbyterian Kohhran Theology kan hriat chianna hmanrua lo ni sela, Baptisma Theology kan kalpui dan leh hriatthiamna atan min tibengvartu lo ni ngei se" tih a ni e. A man Rs. 150/-
6. **Famous Detective Stories**: Hnuchhuina thawnthu lam ngainatute tan hnuchhuina thawnthu ngaihnamw tak tak, khawvel ziaktu ropui leh langsar ber ber kutchhuak lawrkhawmna chu Zothanmawia Khiangte chuan a rawn letling zo ta. A man Rs. 100/-

KṬP HRUAITU LEH A NUPUI

— Lalmuanpuia, Leader
Bunghmun Br. Khawlailung

“KṬP hruaitu nih lai hi kan chhangchhiat zual lai tak a ni ṭhin,” an ti a, a dik hmel khawp mai. Mahse tlangval rei deuh chuan an pumpelthi thei mai awm e. Kan chhangchhiat zual lai tak pawh ni se, KṬP-a kan ṭul zual lai tak a lo nih ve bawk avangin thil buaithlak tak a awm ve thei a, mahse a tih dan kan thiam chuan buai em em lovin nupuite rawng leh Pathian rawng hi kan bawl kawp thei tih erawh hria ila. Hmeichhiate pawh KṬP hruaitu an ni ve ṭhin tho na a, tun ṭum chu mipate tan bik tarlang ila a ṭha awm e.

1. I nupui bum suh : Nupuite kan bum fo chuan hriat chhuah hun an nei nge nge a, a hriat chhuah hnuah zanah thil ṭul leh pawimawhah chhuah tumin a bulah han sawi leh mah teh, a hmaa i lo bum ṭhin tawh avangin a remti mai lo vang. A remtih mai loh chuan i thin a rim ang a, i nupui pawh a lungawi chuang lo vang a, i chhuak lui a nih phei chuan a haw hle che ang a, nang pawhin haw hun i nghakhlel vak lo maithei. I chhuak lo a nih

pawhin nangmah tal i thin a rim ang a, i nupui chu i vaw lo chauh maithei. Hengte hi nupui bum chingten an chan a ni fo mai, chuvangin inbum hi chin loh tawp tur a ni.

2. I nupui chu ngam dan ṭhain ngam rawh : Mi tam tak chuan nupui ngam dan hi kan thiam lo hle a, kan thiam lo mai ni lovin, eng ang hi nge nupui ngam chu ni a, eng ang hi nge nupui ngam lo chu ni tih hi kan hre lo hrim hrim a ni awm e. Tam tak chuan nupuite vin deuh khar khar leh hrawk deuh khur khur, duh duha han tirh phar vel te, an thu leh hla ngaih pawimawh vak lohte hi nupui ngamnaah kan ngai niin a lang a, a dik viau tho mai. Mahse, KṬP hruaitute tana nupui ngamna tak tak zawk chu hei hi a ni - Committee huna kal ziah theih te, hnatan ve theih ṭhinte leh inkhawm hun apianga inkhawm ve ziah theih te hi a ni awm e. Ṭhenkhatte erawh chu Committee-naah pawh an kal ṭha thei lo va, an hnatan thei baw lo va, an nupuite an inkhawm san thei ṭhin lo chu a nih hi maw... Heng zawng zawng hi eng vang nge kan tih chuan ngam dan ṭhaa an nupuite an ngam loh vang a ni ti ila kan tisual vak lo maithei.

3. Hmangaih hle rawh : Bible chuan nupa chu inhmangaih hle turin min ti a nih kha. Nupa chu

tlin lohna laia indawm tawn tur te, hrisel loh lai leh bawrhsawm ber lai pawha inenkawla rawng inbawl sak tur kan ni tih hi hriat reng tur a ni. Dam loh lai ngat pheih chuan inngaihsak zual a pawimawh khawp mai. Nupuite chang ni lovin, fate pawh an dam lo thei a, chutih laiin Committee, Fellowship, inkhawm, hnatan leh thil t̄ul danga vah chhuah leh zin chhuah hialte pawh a lo ngai thei, hetiang hunah hian intih mipaa nupui fanau bawrhsawm takte kalsan mai a awl t̄hin. Mahse, hei hi tih miah loh tur a ni. Kan tel ve theih loh tur thu kan hruaitupuite bulah t̄ha taka sawia t̄hulh rih mai tur a ni, hei hi a puitling zia in a rawngbawltu zia em em a ni. Chuti ni lova kan rawngbawlna zawn ringawt thlira kan khawsa a nih chuan inneih laia kan thu chham kha a fail vek dawn tihna a ni.

4. A tih tur leh tih loh tur hrilh fo rawh : Hmeichhe tam tak hi fel tak tak awm nual mah se fel vak lo, tih awm leh awm lo pawh hre mang lo hi a tam zawk an ni tih hi mipate hian hriat reng tur a ni. Mipaten hre tura kan ngaih tam tak hi an hmeichhiatna a lang a, an lo hre leh lo mai t̄hin tih hi hriat a pawimawh. Rawngbawlpuite leh inlengte dawnsawn thuah te, rawngbawlna inhriat sak chungchangah te, chhung leh

khatte hriat leh dawnsawnte leh inthenawm khawvenna chungchangah te hian thil tam tak hrilh hriat tur a awm t̄hin a, hengte hi hrilh fo an ngai tih hriat a t̄ha hle. Biak a nuam em? A pasal inleng chhungkaw member dangte inleng leh ama inlengte ngei pawh a dawngsawng t̄ha em? A pasal rawngbawlna a tuipuiin a hriatpui em? A pasala chhungte leh ama chhungte ngei pawh a be t̄hain a dawngsawng t̄ha em? A dang pawh ngaihtuahpui ngai a va tam em! KṚP hruaitu nupui a ni tih a inhre reng bawk tur a ni. Miten, “KṚP hruaitu nupui ve lem...” an tih fo chuan mipa thiam loh a ni tih hriat a t̄ha bawk.

5. Hmeichhe t̄awngna awm leh awm lo hre rawh se : Pathianin min siam dan a tang hrim hrim hian mipate hi hmeichhiate ai hian kan chungnung zawk a ni tih hi an hre tur a ni. Hmeichhiaten eng thu mah an sawi ve tur a ni lo tihna ni lovin an t̄awngna awm leh awm lo hi hriattir t̄hin tur a ni. In chhunga patling leh patling inbiakna kara hmeichhe lo inrawlhna awm leh awm lo hi a awm ve a, kawng engkima inrawlh ve tum hi chu a fuh ber lo va, a t̄ul nahek lo. KṚP hruaitu nupui a nih ang ngeiin a sawi tur leh sawi loh tur pawh a thliar thiam tur a ni a, KṚP hruaitu nupuiin sawi awm loh tak tak a sawi fo chuan, chu pawh chu mipa thiam loh bawk a ni.

6. I rawngbawlinaah i mawhphurhna a hriatpui tur che a ni :

Nupuiten kan rawngbawlina min tuipua min hriatpui loh chuan kan chak thei lo va, kan rawngbawlnain awmzia a neih loh chang a tam thin. Hmeichhiate hi an danglam thei viau mai lehngal a, an nulat laia KṹP-a active taka inhmangte pawh hian an pasalte rawngbawlina hi an tuipui chhunzawm duh lo thin khawp mai; an vai chuan ni lo mah se. Hetiang hi a nih avangin mipaten kan zira hemi chungchang hi kan hrilh fo an ngai. Chutianga a nih loh chuan nuamti vak lova kalsan a ngaih chang a awm fo mai ang. Nu thenkhatte phei chuan an pate chhuak tur hi an fate hnenah, "Saw, i pa a leng dawn, ngen rawh, vuan tlat rawh," an ti a, duapzul deuh phei chu an chhuah loh phah leh nge nge thin a nih hi...! Hetiang a thlen fo loh nan hian kan nupuite hnenah kan rawngbawl dan leh kan mawhphurhnate hi hrilh fo tur a ni.

7. Nupui tlan hmang i nei em?

: KṹP hruaitu, OB lai nupuite an han tlan hi chuan miten a tiana te an dem tawh lo va, a titlantu kha an pasalte ni lo mah se an dem tlat tawh thin avangin thil pawl tak a ni. KṹP hruaitu nupui an nih avangin tlan thei lo leh intilungawi reng thei kan

ni bik si lo va, hetiang thil hi a thleng ve thei tho mai si. Hmeichhiaten ngam tak mai leh tlan cho pang maia min han rawng khum ngat hi chuan mipa tan dawhtheih chu har ve tak a ni...! Mahse kan nihna leh kan chung a thil lo thleng atan chuan thil zahthlak tak, kan chung a thleng atana thil mawi lo tak a ni lawi si a, tlan lo tura han tih vel lah hi a mipa lo viau baw si thin nen, kan tlan tir leh mai thin a nih hi.

Pathianah innghat la, i nupui pawh chutah tho chuan inngahtir rawh. Tichuan, a hmaa kan sawite khi ngun takin ngaihtuah la, hlawhtling taka i zawm kim thei a nih ngat chuan, nupui tihtlan, inthen buangbar vel, bungraw lak tih bawr velah chuan harsatna i taw lo vang. Kan inneih laia kan thuchhamte pawh kha ngun taka ngaihtuah thin tur a ni. Nupa kan inthen hian Pathian pawl kan sawi nasa hle tih pawh kan hre tur a ni.

Eng pawh ni se, kan nupuite hi kan rawngbawlina min tichaktu, tui tak leh phur taka rawng min bawl tirtu, nuamti taka rawng min bawltirtu leh kan mawi lohna leh kan mualpho dawn pawha min thuammawitu ni sela, eng vangin nge kan rawngbawlinaah hian kan chak loh theih tehlu an le?

CKTP ROREL INKHAWM- 2013**A hmun : Lunglei Chanmari Kohhran Biak In****A hun : March 1 - 3, 2013****BIAL HRANG HRANG PALAITE THLENN TUR KOHHRAN****BAZAR VENG-A THLENG TUR BIALTE : 9615181178/9612177261**

- | | | |
|---------------------------|--------------------|-----------------|
| 1. Chaltlang | 2. Ramhlun North | 3. Ramhlun |
| 4. Sateek | 5. Sialsuk | 6. Muallungthu |
| 7. Sihphir | 8. Bukpui | 9. Lungdai |
| 10. N. Hlimen | 11. Thingsulthliah | 12. Sesawng |
| 13. Haulawng Bial Zaipawl | 14. East Phaileng | 15. Khawruhlian |

COLLEGE VENG-A THLENG TUR BIALTE : 9615392572/9862426389

- | | | |
|-------------|---------------------|------------|
| 1. Bungkawn | 2. Ramhlun Vengthar | 3. Sumsuih |
| 4. Aibawk | | |

RAHSI VENG-A THLENG TUR BIALTE : 9612204522/8414012718

- | | | |
|-------------|-------------------|-----------------------|
| 1. Chanmari | 2. Khatla | 3. Mission Vengthlang |
| 4. Maubawk | 5. Kawlkulh | 6. Hliappui |
| 7. Lungpho | 8. Kawlkulh North | |

ELECTRIC VENG-A THLENG TUR BIALTE : 8794788368/8974622990

- | | | |
|--------------------------------|-------------------------|-------------------|
| 1. Dawrpui | 2. Electric Veng | 3. Armed Veng |
| 4. Chhinga Veng | 5. Ramthar Veng | 6. Ngopa |
| 7. N.E. Khawdungsei | 8. Teikhang | 9. Darlawn |
| 10. Ratu | 11. Sakawrdai | 12. Zohmun |
| 13. Darlawn Venghlun | 14. Sairang | 15. Lengpui |
| 16. Mamit | 17. Mamit Hmunsam | 18. Rawpuichhip |
| 19. Sairang Dinthar | 20. East Lungdar | 21. N. Vanlaiphai |
| 22. Khawlailung | 23. Khawlailung Dinthar | 24. Cherhlun |
| 25. N. Vanlaiphai Damdawi Veng | | |

VENGLAI-A THLENG TUR BIALTE : 9436157302/9089669889

- | | | |
|---------------------|----------------------|-------------------|
| 1. Dawrpui Vengthar | 2. Luangmual | 3. Vaivakawn |
| 4. Tanhril | 5. Chawnpui | 6. Tuikual |
| 7. Zonuam | 8. Champhai Vengsang | 9. Champhai Kanan |
| 10. Ruantlang | 11. Kelkang | 12. Zokhawthar |
| 13. Kanghmun | 14. Darlung | 15. Reiek |
| 16. Kawrthah | 17. Kawrtethawveng | 18. Zawlnuam |
| 19. Zamuang | 20. Kanhmun | 21. Tuidam |
| 22. Rengdil | 23. Lunglei Venglai | 24. Lunglei Bazar |
| 25. Chawngte 'L' | 26. Chawngte 'P' | 27. Lungsan |
| 28. Tlabung Zodin | 29. Tlabung Chawnpui | 30. Zawlpui |
| 31. Buarpui | 32. Khawhai North | 33. Khawhai South |
| 34. Chalrang | 35. Biate | 36. Sialhawk |
| 37. Tlungvel | 38. Chhingchhip | 39. Hmuntha |
| 40. Baktawng | 41. Khuangleng | 42. Vanzau |
| 43. Khawbung | 44. Farkawn | |

CHANMARI-A THLENG TUR BIALTE : 9615955357/9862982683

- | | | |
|---------------------------|-------------------------------------|-------------------------|
| 1. Venghlui | 2. Republic Veng | 3. Bethlehem |
| 4. Venghnuai | 5. I.T.I. | 6. ChamphaiKahrawt |
| 7. ChamphaiVengthlang | 8. Champhai Bethel | 9. Hnahlan |
| 10. Marpara Ramthar | 11. Lallen | 12. Zote |
| 13. Phuldungsei | 14. Pukzing | 15. West Phaileng |
| 16. Tuipuibari Centre | 17. Damparengpui | 18. Bilkhawthlir |
| 19. BilkhawthlirHmarveng | 20. Vairengte | 21. Bairabi |
| 22. Kolasib Hmarveng | 23. Rengtekawn | 24. Phainuam |
| 25. Hnahthial | 26. Sangau | 27. Haulawng |
| 28. Thenzawl Field Veng | 29. Thenzawl | 30. Keitum |
| 31. Khawzawl Vengthar | 32. Bungtlang Bazar | 33. Rabung |
| 34. Khawzawl Venglai | 35. Chawngtlai | 36. Phullen |
| 37. Khawzawl Dinthar | 38. Phuaibuang | 39. Suangpuilawn |
| 40. Saiha Bial Zaipawl | 41. Lawngtlai Chanmari Bial Zaipawl | |
| 42. Zobawk Bial Zaipawl | 43. CKTP Committee | 44. Mizoram Synod Choir |
| 45. Zaithiam & Item neite | 46. Zoram Pawn Palaite | |

FARM VENG-A THLENG TUR BIALTE : 9863328138/9862611516

- | | | |
|-----------------------|----------------|-----------------|
| 1. Mission Veng | 2. Kulikawn | 3. Tlangnuam |
| 4. Hlimen | 5. Lungleng I | 6. Serchhip |
| 7. Serchhip Vengchung | 8. Chhiahtlang | 9. New Serchhip |
| 10. Saitual | 11. Keifang | 12. Sihfa |
| 13. Mualpheng | | |

RAMTHAR-A THLENG TUR BIALTE : 9436147383/9612631287

- | | | |
|------------------------|-----------------|--------------|
| 1. Durtlang | 2. Zemabawk | 3. Bawngkawn |
| 4. Airfield Vengthar | 5. Leitan | 6. Thuampui |
| 7. Sihphir Vengthar | 8. Lawngtlai | 9. Saiha |
| 10. Bungtlang South | 11. Vathuampui | 12. Zobawk |
| 13. Lawngtlai Chanmari | 14. Tuithumhnar | |

LUNGLAWN-A THLENG TUR BIALTE : 9862925529/9436370826

- | | | |
|---------------------|------------|--------------------|
| 1. Lunglei Chanmari | 2. Tuipang | 3. Kolasib Venglai |
| 4. Kolasib Diakkawn | 5. Kawnpui | 6. Thingdawl |
| 7. Hortoki | | |

Note : Mikhual thlengtu tur Veng ten an Kohhranah Counter an nei theuh ang a, main Counter erawh chu a thlengtu Chanmari Kohhranah a awm thung ang. Kan thlenna tur veng kan biak pawh theihna Number dah a ni a, Palaite nen a hma lamin lo inbe thei ila a lawmawm khawp ang. Tin, eng emaw hmaih palh a lo awm a nih chuan Chanmari Kohhranah an thlenna tur ruahman lawk tho a ni e. Palai lo kal turte thlenna tur Veng kan ruatah thleng ngei turin kan ngen bawk a ni.

CKTP ROREL INKHAWM - RECEPTION & USHERING COMMITTEE

HLAU SUH KA AWMPUI CHE

— Thankunga Pachaua,
Zokhawthar

Mihring hi a huhova nung tura duan kan nihna hian emawni mal bik nihte, thlauhtlak bik nih duh te kan awm lo va. Thenrual tha neih nan kan nun kan buatsaih a, khawhar hnehtu atan u leh nau, thenrual kan siam a, lungngaih leh mangan niah min phentu atan kan hmang thin. Nun hian hlim a duh a, hlim duh avangin hmangaihtu kan zawng a, sum leh paiah nasa takin kan tlan baw; ruihhlo-a tlan mekte pawh hian eng dang an zawng lo, an nun derthawng tak phentu hetah hian ka tawng dah law maw tiin an rui mai chauh a ni.

Nun hi han belchiang ila, hlauthawngin a khat a. Khawvel mit tlung nih kan duh a, thenawm khawveng hmuhsit kan hlau va, mi pangngai anga chhiar kan nih ve theih nan theihtawp kan chhuah thin. Hmangaihtu mit tlun loh ai chuan nakina kan chhhiat derna tur pawh kan hai der mai thin a ni. Chhungkuain mi kan pha lo

ang tih hlauvin in leh lo tha din nan mahni dehchhuah loh pawh paipawnin building tha tak tak kan din zel a. Miten in leh lo tha a nei min tih theih nan mi dang chanai pawh lak kan hnial lo. Ngaihtuahna fim tak kan neih tibuaiin ruihhlo kan eiin kan in a, ni danga kan tih ngam loh kha ti ngam taah kan inngai thin. Hei hi eng vang nge? Nun derthawng tak kan neih kha kan dinpui ngam lo va, thil dang kawrah kan hmang mai chauh a ni. A nihna takah chuan kan nun a la ngai reng a. Phentu kan insiam chawp avang khan a him phah lo va, a ropui phah hek lo, a lem mai a la ni. Nun chhunggrila hlauthawwna kha a reh lo va, kan buai ngaiin kan la buai reng fo.

Mihring leh mihring inkarah hi chuan kan theihna leh tlinna atangin kan inteh a. Kan theihnain a tlin loh chuan hnawl kan ni mai thin. Famkim lohna khawvelah kan awm mek laiin mi dang tana tling tur leh tlak ni tura nun buatsaih reng chu a harsa a ni. Theihna zawng zawng min a sawmkhawm lai pawhin a tehtu mit tlung nih a har thin. Chuvang chuan nun hi a buai a, a rum fo; chutiang nun buai tak kara mi a tluk luh chuan beidawwna chauh a hmaah a awm tawh thin a ni. 'Arbawm

lum" an sawi ang maiin a nun chu a her nulh nulh a, vawn tur zawngin a phar huang huang a, dawm tur dik a hmuh loh phei chuan khawvel mi ni ve tlakah a inngai lo va, vantlang pawn lam hnawl hnua h inngaiin a kawng zawh lai hrehawm tak chu a zawh liam mai thin a ni.

Chutiang hun tawng mekte tan chuan EE Hewit a hla phuah Rev. Liangkhaia'n Mizo tawng mawi taka a lehlin KHB 435-na 'Hlau suh, ka awmpui che' tih hi han bihchiang ve mah teh.

*Hlau suh, ka awmpui che,
Rangka êng zâm hian,
Ropui chung siâr ang
Ka kawng a rawn ên,
Zân khaw dur hnuaiah pawh
He tiamthu a êng;
'Ka kalsan lovang che,
Malin i awm lo'ng a ti.*

A thluk a mawi a, Mizo tawnga dahtu hian a letling nalh baw a, nun a tiharh sawng sawng thei a sin. Hlauthawngte tan thlamuanna thuchah ropui tak a keng a. Khawvelah lawmna a kin a, beisei a bo vek hnuaiah pawh, ni êng, zan thim leh khaw dur pawhin a tihzam ve loh arsi chu a hun takah a lo êng thin ang hian Lal Isua chu min puih nghakin kan tan a êng reng a. Thlir tur dik lo kan thlir

thin avangin 'Hmar Arsi' chu khaw durin a lo hliah zawk mai thin a lo ni. I nun a buai em? Thlaphangin hun i hmang em? Kan lal duhawm chuan 'Zan khawdur hnuaiah pawh 'Ka kalsan lovang che, Malin i awm lo'ng' min ti a nih chu. Hlau leh khura awmte tan zalenna dar khawn a ni e.

*Kan vêl rose pangpâr leh
Lili pâr an chuai;
Lei ni êng ral hnuin,
Thangvân eng rii riai.
Isua, Saron pâr mawi,
Vul lai a chul lo;
Isua, chunglûm lai ni,
Malin min kalsan lo vang.*

Nula tlangval inhma-ngaihte hi an va mawi em! Chhungkaw hlim tak te hi an va duhawm thin em! Eizawna kawnga hlawhtling te hi an va vannei tehlul em! Thenrual thate hi an hlu mang tak e aw! Mahse heng zawng zawng hi khawvel rose pangpar an ni. Kan duh berten min kalsan a, kan tana hlu ber berten min liamsan leh si thin. Rose pangpar mawi takin a lo par a, rei lo teah a lo vuaia, a lo til a, hnawh leh bawhlhlawh a lo chang thin ang hian, hringnun hlimna hi rei lo te atan alo vul a, a tawpah chuan hlim ni ngaiin kan tap leh thin. Min tihlimtu berte hi kan nun tinatu an ni leh si thin. Kan himna

kulhpui nia kan hriat in leh lo, rosum, chhungkua, thenrual leh kan hmangaih berte hi Lili pâr ang maiin kan tan a chuai leh thin. Chutiang hunah meuh pawh Van Saron pâr mawi Lal Isua chuan “Malin i awm lo’ng” min ti a. Zan khaw thim ber hnuaiah pawh Arsi angin kan tan a eng reng thin. A va hlu em kan tana inpeih reng Lal Isua hi.

Nun derthawng, hliah-khuh ngai ngawih ngawih, tling lo leh tlak lo leh tlak lo pawh phatsan ve ngai lova pawmtu avang chuan, a hmaah eng anga thim chhah pawh lo awmin, hlahawm pawh lo hnai mah se; a pawmtu chakna leh hliahkhuhna avangin thlamuang takin a awm ta a.

*Hmatiang hmuh lâwk loh kawng,
Hlahawm a hnai thei;*

*A hnai zâwk chhandamtu’n,
‘Thlamuang rawh,’ min ti.*

‘Chak lote tan Isua lungpui nghet’ a nih angin, nun danglam tak mai a lo lang ta. Lungngaihna chhum dum karah ni eng mawi tak lo chhuak ang hian, khawvel hnawl hnu, vantlang hnawl leh hnuchhawn nun nei mah ni se, a hnena awm mi chak tak avangin lungngaihna leh hlahuina a hneh tawh lo va. Thal lai vate angin thlamuang takin a zai al al tawh a ni.

*Khua thâl sirva tê ang,
Lunglai ka lâwm ta,
Hlimin ka zai zêl ang,
“Min kalsan lo vang,” tiin.*

Hlahuina hmunah thlamuanna a lo awm ta. ‘Isua, Saron pâr mawi, Vul lai a chul lo vang.’



TUM BIK NEI RAWH

■ Tum khat chu khualzin pakhat hian kawng pengthum a thleng hlawl mai a. Chu lai hmuna lo awm putar hnenah chuan, “Ka pu, khawi kawng ber hi nge ka zawh ang?” tiin a zawt a. Putar chuan, “Khawi hmun nge thlen i duh?” a lo ti a. Khualzin chuan, “Ka hre lo le,” a ti a.

Putar chuan, “A nih chuan khawi kawng pawh hi zawh rawh. A lem chuang lo vang,” tiin a chhang ta a.

Tum bik kan neih loh chuan kan vawm apiang kan fuh ang. Enlenna tha ber pawh tum bik neia chumi en nan i hman hunah chauh a tangkai ang.

THIMHLIM MUMANG

— Upa Rampanmawia Renthlei
Leader, Lungpho Bial

Uisa ei puar pum ang maia mar ka pum chu, mu zangthal, ke vei lama tukverh kawngka biang tlawh ran chung chuan chu zirtawp zan thimhlimah chuan ka chul hauh hauh va. Ka muhil tih pawh ka inhriat mang loh lai chuan, Josefa mumang aia sei deuh tur si, John Bunyan-a mumang aia tawi tur si hi ka lo chhin hnan ve hmanhmawh pek a. Chu ka mumangah chuan Trinitarian pa mumang tur reng a mawi hian, Kristian Thalai Pawl hi Group thumah fel tak mai hian a hming zulzuiin K, T leh P hming chawi hian an lo inthen pek a. Thil mak tak mai chu, Group-a inthen siin, an lo inzat lo nuaih mai a. Group inthen dan pangngaiah te chuan a inzat thei tur ang bera thenin, intihsiak a tul emaw, sum tuak a ngaih pawha intluk tawh thei tur ang bera then thin hi ni thin chuan ka hre bawh si a. Mahse, chu aia mak zawk ta mah chu Group member inzat lo leh inthat hleih deuh nuaih si chu an lo inngeih em em mai a. Mahni group a nghet lem lo leh tui hnan lo,

group danga tel deuh zawk zawk te an awm laiin, Political Party ruihchilh fate ang maia 'Pa te hnung zuitu nihna' anga ngai a nghet tlat mai te ang maia sawh sawn mai mai theih loh chi an lo awm tehuh mai bawh a. A tlem ber Group a langte pawh khan, a tam ho Group a awm chhung chuan ralban mai mai an lo tum miah bawh lo va. Chuvang chuan khawvel awm chhunga group nghet, awm reng tur ni hian ka hria a, a pawl pum pui ropuina tak pawh niin ka ngai ta hial a. Chung group thumte chu.....

K-Group :

He Group hi a lo nawm hmel nasa mai a. An boruak lah a zangkhai a, member rilru pawh a zau halh hian a hriat a, a engti zawng mai pawha nun hi a leng ta vek emaw tih mai tur a ni a. Kohhran che vel hmu phak, amaherawhchu a tak taka chhawr theih tur chuan Revival lam tawngkam takin 'Khawih nawn leh ngai' an tam khawp mai. Chuvanga K- Group hming pu ta mai chu an lo ni a. Chu Group-a member tam ber chu, mahniah tuina em em pawh nei lo an ni deuh fur a. Hnatlan dawn pawha, "Eng nge chawhmehah an ken dawn? Uisa a nih loh pawhin Broiler tal keng se," ti chi ho an ni. Chhanchhuah ngai, kut khinghnih pe meuhva

kaihthawh ngaite awm tamna a ni a. Chutiang chu a nih avangin chhung inkhawmah pawh an hming hian chham a hlawh hle hlawnm thin. An nu leh pa, pi leh pute, nutei te chhungkua leh Vanbawng, Vapar leh Vaitin lam emaw ni a an nitei te chhungkua thleng thlenga, "Ani hi in tawngtainaah in lo hre ve thin dawn nia," tia an inchah ve fo thinte an ni a. Biak In leh Kohhran Hall-a tawngtai thin an thalai pui ten, an hming pum leh Sap hming, an koh duatna nen lama an chham rik dum dum chang lah a tam. A chang pheih chuan ram pum huap meuhva tlaivar thak thaka tawngtaipui ngaite an ni. Chuti chung chuan, chuti taka chaw nghei leh tlaivar vara tawngtaina rah chhuah chu han hmuh nghal thut tur reng a awm mai thin si lo. Pathianni a lo thlen chang te hian inkhawm kal tur tawh zawng ngat te hian hming pum puma an lam chhuah thin hote khan kekawrbul leh bahlek chauh ha chungte hian a tawngtaipuitute kha an han sulpel ngauh ngauh thin a. A then lahin tu verandah emaw thuin bawp an khawkerh a, inkhawm kal tur nula chhe lo an tih zawngte an lo 'e hem' vel thul. An Cell phone-a 'fb' kal tlanga an tih chhuah theih leh zai riin an

inawi muthlu mai mai a, hlim hmel pu tak anga lang siin lungawina kim erawh an hmu zo lo tih a lang reng si. Mahni awmna Group hming pawh hre miah lova kumtluan thak thak ta te pawh an awm fo thin. Hmeichhe zingah lah Biak In lam hawi lo fe fe an tam hle a, K.T.P. member lak laia an chhungte'n an hming an ziah luhtir takte kha an nih miau avangin, an 'Faith Promise' pawh an nu leh pate'n, "Mami hi eng zat nge a intiam ve aw, a... heti zat hi ni mai teh se, amah a la tho bawh si lo va," tia an pek sak tak mai mai chi te an ni a. Member Inkhawm kim zan baka an hmel hmuh tur awm miah tawh lo, a zan tin deuh thawa dar rik ruala 'khawi lam tlangval Bike tial leh ring ber mai nge a thlan chhuah chu' tih mai tur hnung lama bet per thlapa, sam chhawl leng phe vawn vawna mual liam awn rawih rawih ta te an ni. Inkhawm ve chhunah lah Bible leh Hla Bu kar chu romol bakah hmuam ruka, ei ruk tur hian a kam kau tuar mai bawh a. Chuti a nih mek lai chuan Kohhran hnatlanna lam te hi chu an telna turah an lo ngai nghet ve leh em em thung lawi a. Thahrui neihah te leh tlawmngaih chhuah kawngah pawh duai lo zet zet he group-ah hian hmuh tur an lo tam hle mai.

T-GROUP :

Tam vanga tuia hlim tur ni se he group zet hi chu an ðilh ðiahna rei tawh tak tur hi a lo ni a. Member pum pui aþanga za zela chhut tur phei chuan chhut chian ngamawm loh khawpin an tlem a. An tuina leh an inpumkhatna bul ber chu ‘Þawngþaina’ a nih avanga T-Group hming pu ta an lo ni nghe nghe a. Mi dangte tan rilþam an tuar a, pumpui ulcer positive hrik pai ve tho an nih pawh inngaihtuah chang lo khawpa þawngþai atchilh bur mai ho an ni. An ðhiante’n mumang ropui leh nuam tak tak, lukham delh saisir bur chung a an mana, an hnarpui tluk tluk laiin, anni ve chuan mang neih a hnekin an khup lawk takte chuan Biak In chhuat char tak takte leh lungte mum chung taka ðhingþhi ran chungin khawmualpui dang daiha an rawngbawlpuite leh an bul hnaia mi hla zawka an hriatte Pathian hnenah an þawngþaipui mawlh mawlh thung a. Pawl pum pui kal theihna leh chakna hnar ber hi þawngþaina a ni tih an hriat chian em avangin an tui lo thei lo tlat a ni. Anmahni inbun ruaka hrehawm tuara an beihna chuan lawmna nasa tak a thlen ðhin a, an lawm luat avanga an bianga mittui luang ngiai ngiaite chu thlir ninawm loh tak a ni.

Finna hmanga chin fel mai harsa te, thiamna hmanga ngaihtuah chhuah harsa tak te, sum leh paia lei fel theih mai loh chi sualna mak tak tak leh khirh pui pui a thlen chang pawha þawngþaina hmachhuana beitate an ni. An hmel timawktu kawng khat erawh a awm ve theiin a lang a, chu chu an tuina ruama setana inrawlhna vang a ni thei. Chu hmunah chuan an tuina ang þawmpui phak lo hruaitu hmuh hniam an lo awlsam ta tlat ðhin a, anmahni an inven hman loh chuan chu chuan inpumkhatna leh chakna lam aiin daidanna bang a lo ping ru thei ti tih ðhin a, chu tak chu an tan pawh thang hlauhawm takah a chang hlauh thei tih mai lo chu fakna tur hlir ni mai hian a lo lang a.

P-GROUP :

‘Miller of the Dee’ tih hlaa chhangphut hertupa ang maia engkima lungawi tlat mi, an thawh tawh leh an chan tawka lungawi em em, Group dang an phun sup sup pawha ‘Phunnawi ve ngai lo’ an nih avanga P-Group hming lo pu ta hi an lo ni ve thung a. Phunnawi lo hlang awm khawm an nih miau avangin an group inpumkhatna pawh ðha tak mai a ni. An aia chak lo zawkte’n an bula hnathawh nuam an ti a, an aia zaithiam lo zawkte’n an bula

zai nuam an ti bawka, an hma lah chu a han zau nasa mai mai khawp a, group dang hmà sen rual loh tur hmà vektu hi an lo ni reng mai a. Han fellowship dawn hlek sela, a ruaitu ber ang maiin an phe a. Thutthlengsei put kawi zawng zawng leh Sound box lian pui pui put vu vu mai te chu group dang tih ve thiangah hian an ngai lo hrim hrim emaw chu tih awl khawpa an kuta an dah tlat hi a lo ni a.

Sound wire/flexible wire chat zawm that tumna lama tlangval thenkhat ha ui-ngho thawh chhuahpui zat te hi chu chhiar sen chi pawh hi a ni lo hrim hrim. Nula hote hian Kohhran tana an dar-zai lem teuh thin ziate hi hriatpui vek phe se chuan chawplehchilha star nghal tuk tukna tham a ni hial zawk a ni. Hun pui a lo her chhuah chang te hlei hlei hian an phunchiar loh zia hi a lo lang fiah thin a. An thiante'n an nula duh zawng ber berte, an tlangval duh zawng te hruaia thutpuia, pian nalh loh phah tur hial khawp ei rek rek tur an paipawn el ul lai leh eng hla ber nge an sak tih pawh inhre mang lova nihawichi chip chung a thlek ber ber laiin, anni chuan Kohhran Choka chung meikhu karah a dekchi thumna tur bel tih so hman loh hlau em emin, thing alh tha duh mang hlei lo leh hnawng baw si an tuah belh sauh sauh a,

chhemthei keh, rem khawm chawp ngai ngei mai chhiin hmui vung lungin an chhem ngat ngat a. An tih so hmasak zawk bel khatna leh hnihna chinia thlum paha an thiante hla sak lai faifuka zawm ve ringawt pawh chu hetih hunah zet hi chuan ralpui phiara phiar ngai, thil tih harsa zet mai a tling tawh thin a ni. Mahse, hetiang meikhu kar ang chi ah ngei hian a ni Isua zarah lawmna an chan tlat thung thin ni. Thiante kalsan hnawk leh bal zawng zawng lungawi taka thianfai a, silfai a, seng fela remkhawm vektu an ni. Sep sep leh ser ser an kalsan phak a, lungawi lo thei lo dinhmunah chu an chi tha tuh chuan a thiahpui phak tlat a lo ni.

Kristian Thalai Pawl chhunga chutiang taka group thum ze inang lo pui pui inhne rem, chak leh lungual taka an lo kal mup mup ka hmuh chuan mak ka ti a, ka lo lawm em em mai a. Hetiang taka Pawl ropui hi khawi hmunah mah ka hmu tawh dawn lo a nih hi le ka tih mek lai chuan, “..Chanchin thar langsar zual tunah...a puangtu..” tih ri fiah leng lawng hian min tiharh zawk mai a. Chanchin thar ka en zawh hnuah pawh chuan, “Chu Zirtawp zan thimhlim zet chu le !” ka la ti zui ta vang vang a♦

HLAWHTLINNA

— Upa Zarzokima Khiangte,
Shillong

matthaia 25:14-30-ah
hian talent
chungchanga kan Lalpa Isua
Krista tehkhin thu kan hmu
a. Hei hian Vanram
chungchang min kawhhmuh
bawk a. Heng baka min
kawhhmuh pawimawh tak
chu - hlawhtlinna
chungchang a ni.

He tehkhin thua kan
hmuh ang hian an pu zin bo
tur chuan a bawih pathum a
ko a, pakhat henah talent nga
a pe a, a pahnihna hnenah tal-
ent hnih, a pathumna hnenah
talent khat. Tichuan a zin bo
san ta a. An laka a beisei chu
talent pekte kha lo peipung
sela a ti a ni. A lo haw leh khan
talent nga leh hnih
dawngtute khan a letin an lo
peipung ve ve a. Chu chuan
an pu chu a ti lawm hle a.
Amaherawhchu, talent khat
dawngtu kha erawh chuan
peipun chu hnai lo, a phum bo
va, an pu kha 'mi ti kher kher,
tuh lohnaah pawh at thin, a

tihdarh lohnaah pawh seng
thin' a nih thuin a lo chhang
let ta chiam a. A pu thinur
chuan, 'pawnaah paih chhuak
ula, tah chuan tah leh ha
thialna chu a awm ang,' a ti
hmiah ta mai a ni.

He tehkhin thu ațanga
kan zir chhuah chu Pathian
chuan hlawhtlinna hi kan neih
nun lam ațangin a teh ve lo va,
kan neih kan hman dan
ațangin a teh zawk a ni, tih hi.
Kan neih zawng zawngte hi
ama hnen ațanga kan dawn
vek a ni (I Chro. 29:14).
Thilpek a ni (gift). Min kaw
tir mai a ni. Thawh chhuah
theihna min pe mai zawk a ni.
Khawvel chuan hlawhtlinna
hi sumah te, larnaah te,
nihnaah te, hmingthannaah te
a teh thin.

A pahnihnaah chuan he
tehkhin thuin min zirtir chu -
rinawmna a ni. Talent khat
dawngtu kha a rinawm lo a ni.
A dawngdah a, a neih chhun
kha a peipung lo a ni. Pathian
laka mi rinawmte hi khawvel
mite chhiar dan chuan
hlawhtling an ni fo lo. Zawlnei
Jeremia chuan kum 40 chhung
rawng a bawl a, nimahsela, a
thusawi tu man an awih lo, a
chang leh tan inah an khung a,
a chang chuan tuichhun-

chhuah ruakah an thlak thul. A tawpah phei chuan a duh lo chung chung Aigupta ramah an hruai lut ta a. A va thi ta a ang riau. Baptistu Johana pawh kum khat tling lo rawng a bawl a, lal Heroda thil tih dik lo huaissen taka a sawisel avangin a lu an tansak a. Heng mite pahnih, Pathian chhiahhlawh ropui tak takte hi khawvel mite ngaih dan chuan mi hlawhtling an ni kher lo ang. Nimahsela, Pathian ngaih chuan chutiang niin a lang lo. Hengte hi lo ngaihtuah

ta ila :-

- (a) Hlawhtling kan tih hian tu teh fung nge kan hman?
- (b) Hlawhtlinna kan um danah hian kan awm dan leh kan tum dan hi eng nge ni?
- (c) Hlawhtling tur hian a man pek eng nge ka huam?

*Pathian mi ni la;
Pathian hmunah;
Pathian hna thawk la;
Pathian kawngah*



PEN KHAT

■ *Mi â chuan thil pakhat chiah a ngaihtuah a, chu chu nun ve tawp a ni; mahse engtia nun tur nge tih an ngaihtuah phak lo.*

I hlawhtlinna rahbi chu hlawhtling tura phu taroka i beih hunah i rap tan chauh ang. Hlawhtlinna hi chhanna zawng zawng hriat lawok vekah a innghat ber lo va, tum mumal tak neih leh chumi tihlawhtling tura theihtawp chhuahah a innghat zawk.

I hmâah harsatna a lo chhuahin bihruksan lovin huaissen takin hmachhawng thin ang che. Harsatna bihruksan hi harsatna sut kian dan tha ber a ni lo. Harsatna chu ngun takin zir Chiang la, a mal te tein thet darh la; tichuan a chin fel dan tur chu a inhril mai ang.

Hnathawok tura i pen chhuah hmain ruahmanna fel tak nei hmasa thin ang che. Thil ropui tak tih i tum a nih pawhin a tê ber atangin ruahmanna fel tak nei la, i hna chu khêk lovin thawk tan nghal ang che.

Khawvela mi hlawhtling leh entawn tlak ber berte hi an awmna hmuna hna thawk tantute an ni. I thlen chin tur hriltu tha ber chu tuna i awmna kha a ni. Mel sangkhat kal tur pawhin pen khat atanga bul tan a ngai zuk nia!

— Ziaktu hriat loh

KUHVA MIN LO THEH

— H. Thantluanga
Chanmari Br. KṮP, Aizawl

'Kuhva min lo theh?' tūn han in ba ṭhin deuh chawt ila, a ei ṭhange chuan kan phawrh thei deuh zel a nih hi!

Kuhva hi Mizote hian kan ei nasa hle a, mana leiah chuan sum sen kan hreh lohna pawl tak a ni ngei ang. Kuhva kan ei chhan ni a langte chu - rual pawl nan te, zahzel atan te, kam hlei vang hrim hrim te, ka chhung tihrintui nan te leh mi dang ei kan entawn vang te niin a lang. Tlangval kuhva ei lote paw'n nula rimnaah chuan kan hum lut ṭun ṭun ṭhin a nih hi maw.

Hlawkna a awm lo

Kuhva hi ṭhalaite bakah pitar leh putar thlengin kan ei a. Kan ei kan ei a, kan ei zawngchhang a, kan sim hlei thei lo a ni ber e. Kuhva hi han chhut Chiang ila taksa tana ṭhatna sawi tur kan hre tlem viau ang. Kuhva kan ei avangin Theichhungsen ang maiin kan ka chhung a sen hiam huam a; chinai duh aia tam kan ei changin kan ka chhung a pilh thip hlur a, hmui bawr vel a sen berh deuh luai bawk ṭhin.

Kuhva ei ṭhinte hi a ei ngai lote bula an awm chuan an lang ṭawp hma bik a; hei ngawt pawh hi ṭhalaite tan chuan inenletna tham a ni.

Thusawi mi kan nih chuan kan fimkhur loh changin kawrah kuhva per a sen deuh thluah thei a. Kawr chang a ni lo, Bible leh Kristian Hlabu te meuh pawh kuhva avangin kan tisen thliah thluah zawng a nih hi! Kan Bible châng duh leh kan chhiar ngun deuhthe chu kan chhiar rin zawh poh leh a sen pherh nasa zual a. Chutiang bawkin kan hla duh zawng leh kan sak ngunte chu kan sak rin zawh poh leh a sen val kelh kulh zawng a nih hi! Ṭhiant e zingah inti-polite tak, ha lang deuh ṭhaha kan nuih lai hian kan bula mite chuan kan hmui leh ha bawr vel an thlir ngun viau thei. Kan hmelṭhat vang ni hauh lova miten min melh leh zauh ṭhin nia kan hriat chuan kan hmui leh hmai bawr vel han tuai deuh thuak thuak ila, rilru a dam huai zel nia! "Tun thla chu ka ha a sen nasa em mai, ka'n tifai teh ang," i tih chuan cheng eng emaw zah sengin ha doctor i pan thei ang. Hlawkna lam aiin hekna lam hlir a ni e.

Rimtui nan zuk leh hmuam a ṭangkai lo

Mi ṭhenkhat chuan zuk leh hmuam ti ngai reng reng lote hi

an ka chhung a rimchhiat hmel bik an ti fo mai. Mahse, sapho ha var leh fai tak han hmuh hi chuan a sawisel thinate ngei pawh hian 'A ha chu a va han nalh, a va han inhmeh tak em!' zuk ti zawk tlat a! Vun rawngah hian kan lo inteh thin nge ni a, kan hnam ngaihsante'n an ei loh vang zawk ni ang?

Cancer chi hrang hrang thlentu meizial leh kuhva avanga ka chhung a rintang nia kan hriatna rilru hi paih bo tawh ila. Kuhva leh meizial kan tih loh avangin ka chhung a hriselin a rintang zawk a ni tih i hre tawh zawk ang u. Ha nget, hahni puam leh hnai avang te, ka chhung hrisel loh avang te leh pumpui that loh avangte'n ka chhung a rimchhiain, thaw pawh a rimchhe ngei ang. Mahse, henge pawh hi doctor-te rawnin a tihdam theih a ni.

Pliers leh rawtlung hman hun a la thleng thei

Ha nget leh thil thlum ei hi a in hmeh lo a; thil thlum hian ha nget a chiah a, ha na a siam thin. Chu ai pawha la inhmeh lo zawk chu ha nget chhe tawh chung a kuhva thial hi a ni. A changin ha kan thial khem thul, buaithlak tak a ni. Ha nget chung chung chuan kuhva i ei lo vang u, ha nge kan thial kuhva tih pawh hre lovin kan thial kual vel a. Kuhva

kan lem rualin ha kan lo lem tel daih thei a nia. Ha lem vuate tan phei chuan kuhva ei loh law law a tha zawk. Ha karah kuhva nawi a lo lut a, ha hni a kam kau a, mi zingah ha lem han lak chhuaha silfai a rem meuh si lo; buaithlak tak a ni.

Eina tur ha alawi nei tawh lo mi pakhat chuan a kalna apiangah pliers leh rawtlung a keng thin a. Kuhva a ei dawn chuan pliers-in a rah a chep sawm hmasa te te a; chumi hnua rawtlungah a rawt dip leh a, tichuan a ei chauh thin. Kuhva avanga harsatna leh zahna kan tawh ve hma hian i bansan hram ang u.

Taksaah hna a thawh dan

Kuhva rah hian kawng hrang hrangin kan taksaah chhiatna a thlen thei a. Thisen kawng a tibuai a, thluakah thawkin mi a tirui a. Lungphu rang, BP sang leh luhai a tichhuak a, chaw pai jawihna a tibuai theiin kua a tipuar thei. Pumpui a tipan theiin kaw that lohna a thlen thei a, chaw chakna a tireh thei baw a ni. Chinai hian pumpuia pilh a siam thei a, hetiana pilh rei tawh chu cancer-ah a chang thei. Panhnah sil fai taw lo avangin ka chhung natna chi hrang hrang bakah kawthalo, santen leh hri tha lo kan pai thei a. Ha tuamtu enamel

a tipan a, ha a ziau hma a, ha nget a awm duh a, kam chhung natna a thlen thei baw.

Kuhva ei sual avanga dandawi in pan ngai khawpa taksa lama harsatna taw te, motor accident taw hial te pawh sawi tur an awm nawk a ni.

Khawpui tibawlhhlawhtu

Kuhva hi in leh a vel, khawlai, kawngpui dung tibawlhhlawhtu zinga langsar ber pakhat a ni a. Khawlai han leng chhuak ila chinai tahna hmun tin hmun tangah hmuh tur a awm a. Kawngpui dunga thirbante hi chinai tahna tur renga khuanu'n a lo ruat ni awm takin ban phak chinah chuan tu kutzungchal nge tih pawh hriat sen loh, hnu chhui thiam Forensic expert-te tan pawh luhaina tham hial tling turin a var kawi kual nasa a, hmun thenkhatah phei chuan a senin a la inthial zui. Aizawl kawngpui dunga thirbante hi han chik deuh ila kuhva avanga him tha sawi tur alawi hmuh tur a awm mang meuh lo.

A changin kan kuhva eite hi kan lem tha duh lo va, mawi leh mawi lo pawh thlu lovin kawngpuiah, step-ah, footpath-ah, pangpar khawinaah (pot), bathroom-ah, toilet-ah kan chhak duh zela. Mi thenkhatah chu

mi ina kan lenin tui dehna hmunah kam kan thuah ngawt a, leih tleng nial nual, fai mang lovin kan kalsan leh mai thin. Hei hian kan la changkan lohzia leh ram hnufual kan la nihzia a hril a ni. In neitute lakah kan mark a sang lo viau ang.

Sawrkhar office chu sawi loh Biak In leh a vel pawh zah lovin kuhva eina kan chhak, chinai kan tat duh zel a nih hi! 'Kuhva eina chhak suh' tih inziakte chu ngaiah kan neih a, a tarna chawpin kan chhak khum zel a. A mawi lohzia kan hmu a, kan sim duh der si lo.

Vai rama thangkhat lian zet lehkha zirin min hrihl dan chuan 'Vai rama kuhva eite hi hnam hnuaiahnung zawk leh mi rethei zawkte an ni a, mi hausa leh mi pangngai chin chuan kuhva hi an ei meuh lo' tiin. A thu min hrihl hi tak tak a ni tlat mai.

Hun tha a inher chhuak mek

Kuhva leh meizial ak lut tan tan chung a nula rim hun kha a liam mek a, kuhva ei ngai lote leh meizial zu ngai lote hun a rawn inher chhuak mek a ni tih thalaite hian i hria ang u. Nula tan pawh zan tin ha sen reng mai; Cigarette leh Zo zial inchawhpawlh rim tawrhhlalhawm tak, cancer thlentu ni baw si inleng neih fo ai chuan

zuk leh hmuam ti ngai lo; ha fai leh var, thawmhnaw thianghlim tak inbel zân mai inleng neih chu thiante zingah pawh inchhuanna tham a tling a ni.

Kuhva atana kan sum hmanral

Aw le, kuhva atana kan sum sen ral dan tlangpui i han chhut chhin teh ang hmiang. Ni khata Rs. 20 man ei zo thin kan nih chuan kar khat chhungin Rs.140 kan hmang ral a. Thla khat chhungin Rs. 600 kan hmang ral leh a. Kum khat chhungin Rs. 7,600 teh meuh kan lo hmang a nih chu! Kum nga chhung phei chuan Rs. 36,500 kan hmang a, ni khata Rs. 20 man kan ei char char chuan kum 10 chhungin Rs. 73,000 man kan ei tling der a nih chu! Kan pumpui chu a ngaihtuahawm khawp ang; rulhut meuh pawh ei tur nei lovin an thi thei hial ta ve ang.

'Khuang lova chai' tih ang maiin kuhva leh cigarette hi unau ang mai an ni; lak hran hleih theih an nih loh avangin i han chhut tel ve hrim hrim teh ang. Ni khat chhunga Wills Flake bawm khat zu thinten kum 1

chhungin Rs. 10,950 an hmang rala, kum 10 chhungin Wills Flake leh kuhva atana sum an sen zat chu Rs. 1,82,500 a tling hial a ni. Cigarette heh zual phei chuan ni khatah bawm 2/3 vel an zu tlangpuia an la ti leh ta nghal! Gold Flake hi Rs. 45 a ni a, Navy Cut hi Rs 50 a ni bawk, a bak chu i duh angin lo chhut ve mai teh. (Cigarette man hi September 2012 anga chhut a ni)

Thil tha tih nan zawk le

Ni tin kuhva ei thin, inkhawm chhung darkar 1 lek pawh a tel lova hrehawm ti kan awm a nih chuan 'Tun thla atang hian kuhva ka ei tawh lo vang' tiin Pathian chakna ringin intiam rawh le. Pathian ram zauh nan Faith Promise-ah emaw, mi harsate pualah emaw khel lovin thla tin Rs. 1,000 i pe thei ngei ang. I nghei hma aiin i nghei hnuah kuhvain a lo bawih nasat tawhzia che i hre chhuak thei chauh ang. I taksain a hlawkpui piah lamah thlarau lamah pawh malsawmna i hmuh ngei ka beisei. I Petera 1:16-ah chuan "Nangni in thianghlim tur a ni, kei ka thianghlim si a," tih ziak a nih kha ♦



- Mi dang hnena an thilpek hre zui reng lo, mi dang hnen atanga an thil dawn erawh hre reng thinte hi mi nihlawhte chu an ni. — *Elizabeth Bibesco*
- Nilenga rim taka hnathawk thin an awm. Nilenga duhtusam thin pawh an awm. An duhtusam thleng tura nilenga suangtuahna hmang thin an awm bawk. Hlawhchham i duh chuan a pathumnaah hian tel teh, chutah chuan hlawhtling tura thawhrim a ngai hleinem — *Steven J. Ross*

Hruaitu CHANCHIN

Upa Zonunmawia
General Secretary, CKTP

Upa Zonunmawia hi Pu R. Vankunga (L) leh Pi Hrangthangi (L) te fa tlum ber a ni a. An unau hi 7 an ni a, an upa ber an chan tawh a, tunah hian unau mipa 3 leh hmeichhia 3 an ni. Hming puma koh a hlauh hle a, Mission Vengah chuan "Mawia" tia kotu an tam hle a, KTP member-te erawh chuan "Pa Mawi" tiin an ko deuh vek thung.

A naupan tet aţangin lehkha zir lam timi tak a ni a, Boys' LP Sikul (Pu Lawma Sikul) aţanga inzir ţanin Middle School leh High Sikul chu St. Paul's High School-ah kalin HSLC a zo a. Pachhunga College-ah kal chhunzawmin B.A. (History) Honours a zo a, North Eastern Hill University (NEHU), Shillong-ah M.A. (History) leh M.Phil (Master of Philosophy) a zo leh bawk a ni. B.A. a exam lai hian a ban ding lam a titliak palh hlauh mai a, vei lama zia zir chawpin a exam tluan chhuak a. A vanneiha siamin,

NEHU Top 10 zingah lang phain pathumna (third position) a hauh pha a ni. A sikul luhna thin St. Paul's Higher Secondary School nen hian inthlunzawmna nghet tak an la nei reng a. Paulians Alumni Association dintute zingah telin hruaitute zingah a tel chho reng a. Tunah hian St. Paul's Higher Secondary School Child's Right Committee Vice Chairman atan ruat a ni nghe nghe.

Amah hi a naupan lai leh a tleirawl chhuah lai vel pawhin mi nungchang tha tak leh fel thawkhat tak a ni thin a. Pa inhmuam up vel thiam lo tak, fiamthu duh tak, kawm nuam angreng tak, haihawt tak, haihawt a ni tih inhre tak si a ni a. Nula rim cheuh cheuh aia fiamthua sawisak vel nuam ti zawk mi a ni thin. Miss Aizawl 1991 leh Miss Mizoram 1992 contestant hote pawh kha Vanapa Hall-ah interview neihpuiin a lo chhawnnchhah hrep tawh hlauh a. A tawp a tawpah Ramhlun Vengchhak KTP Treasurer NI. Lalzarmawii chu dam chhunga kawppui atan a thlang fel ta a. March 1, 1996 khan Mission Veng Biak In Pui-ah an innei a. Fapa 1 leh fanu 2-Samuel Vanremruata, Teresa Vanmalsawmi leh Mercy Vandingpuii te an nei a. A te ber Mercy hi a sen laiin an chan a ni.


Kum 1990 hma lam kha chuan KṯP aiin YMA lamah a inhmang ṯangkai zawk mah ṯhin a. Kum 1991-ah Mission Veng Branch KṯP Asst. Secretary niin, kum 1992-1994 thlengin Secretary hna a chelh chho leh a, kum 1995-ah Asst. Leader niin kum 1996 & 1997-ah Leader a ni a, 1998-ah Asst. Leader a ni leh bawk. Hetih lai hian Mission Veng Bial KṯP-ah pawh hruaitu niin Bial KṯP chanchinbu "Ṭhalai Kantu" enkawltu te pawh a ni ṯhin bawk. Mission Veng Branch KṯP chanchinbu "Biakinpui Fortnightly" bul ṯantu niin KṯP-a a tel chhungin chanchinbu enkawltute zingah a tel chho reng bawk a ni. Kum 1996 -1998 chhungin Central KṯP-ah Asst. Secretary nihna chelhin "Kristian Ṭhalai" Joint Editor a ni bawk a. YMA lamah pawh active takin a inhmang reng a, Mission Veng YMA South Branch-ah Executive Committee member niin an Branch chanchinbu "Kan Veng" a enkawl ṯhin a. Kum 1999 khan YMA President nihna a chelh bawk a ni.

Kum 1998-ah Mission Veng Kohhran Upa atan thlan a ni a, kum 1999-ah Aizawl Chhim

Presbytery-ah nemngheh a ni. Mission Veng Kohhranah Treasurer leh Secretary chanvo te a chelh tawh a, Mission Veng Bial Secretary a ni tawh bawk.

Eizawinna lamah kum 1992 - 1998 chung khan Private Secretary to Vice Chairman, Mizoram State Planning Board hna a chelh a, hetih lai hian Zozam Local TV-ah news reader a ni ṯhin bawk. Kum 1999-ah Republic Presbyterian English School dinpuin Principal hna a chelh a, kum 2002 aṯangin Synod Information & Publicity (Synfo) Coordinator atan lak a ni a, he hna hi kum 2012 thlenga chelhin kumin (2013) aṯang hian General Secretary/Coordinator CKṯP nihna a chelh ṯan a ni. KHB. No. 22 (Pathian thil rel dan chu) hi a hla duh berte zinga mi a ni a, Johana 3:16 hi a Bible chang thlan a ni bawk. Tunah hian Synod Press bul Mission Veng-ah an chhungkuain an khawsa a, a biak pawh theihna chu 2326372/2322285(O), 2325266(R), 9436152024(M) ah te hian a ni e♦

Note: Upa Zonunmawia chanchin hi Kristian Ṭhalai May, 1996 issue-a mi lak chhawn leh belhchhah hret a ni e.



HRINGLANG TLÁNG

Vavikhat chu pa pakhat hian ram zau tak mai hi a lei a, a ram lei chu tha takin a hung chhuak vek a. A chenna In tur chu tlema awih tlan deuh, khaw thlirna remchang, a ram zawng zawng lan theihna turah a sa a. Chu ram chu kawng khatah chuan hmun tha tak leh duhawm tak a nih tehlul nen, harsatna lian tak a tavok ta hlauh mai a. Chu chu a ram chhunga tui a awm lo tlat mai chu a ni! A ram chhungah chuan hmun tam takah tuichhunchhuah a lai a; mahse, tui reng reng a lai chhuak thei si lo! A thlai chawmna tur leh mamawh dang a hman tur tui chu hmun hla taka mi harsa takin a la ringawt mai a.

Chutiang hmun hla taka mi harsa taka tui lak ngai chuan a rilru a tihah em em a. Amah lah chu Pathian awm pawh ring lo, khawvel thil chauh ngaihtuah mi a ni si a. Zana lah thin thiin a muhil ngai lo va, eng ri ri emaw hi a hre zan tin mai a. Ramsa hlauhawm emaw, rukru thawm emaw a nih ringin a han zawng kual ngial thin tak na a, eng mah phei chu a hmu ngai lem hlei lo va. Zana thawm a hriat thin thu chu a thiante hnena a han sawi lahin a thiante chuan thlarau sual thiltihah an lo puh mai bawh thin si a. Thil chi hrang hrang a ngaihtuah kual a, thlarau sual te thleng thleng chuan a ngaihtuah kual ta zel a. A tawp a tawpah chuan tihngaihna tak a awm lo a nih hi tiin a beidawng chuan a ram chu mi dang hnenah hralh zai a rel ta a, hmun danga insawn daih a rilruk a. Duh taka a lei a ram chu beidawng takin a rauhsan ta a.

A ram leitupa chu amah ang lo tak main Pathian tih mi tak a ni thung a. A ram lei a thawm an hriat thin thu te chuan han sawi thaih thin mahse, a thinlungah Pathian in thlamuanna a pek tlat awangin hlauh eng mah a nei lo va. Zana Pathian a pawl hnu in tui takin a muhil a, buaina engmah a tavok ngai lo. Tui awm lo awanga harsatna awm pawh chu Pathian hnenah a hlan mai a ni.

Zankhat chu zanlai-ah hian a mu tui lai tak chu eng emaw hian a tiharh hlawol mai a. Pathian hnena a thawngtai zawh chuan thawm chu ngun takin a ngaithla ta a. Chhuata beng si-a a ngaihtlak vang vang hnu chuan thawm chu in hnuai lam atang ngeia lo chhuak a ni tih a hre ta a. Rilrua Pathian fak chung zelin a mu leh ta a.

A tuk khua a lo var a. Pathian a pawl zawh hnu chuan zana thawm a hriat kha en Chiang turin a chhuak ta a. Thawm lo chhuahna lai ni-a a hriat chu ngun takin a han bel Chiang a. Khawimaw lai atanga tui lo luang chhuak thawm ni ngein a hre ta a. Pathian chakna leh thiltihtheihna rinchhanin chulai hmun chu a lai ta a. A hman khawp mai pawh ni lo, a ram chawmna tur khawpa tam tui a lai chhuak ta mai a.

Mi pakhat ti beidawnga, tihlautu kha mi pakhat dang Pathian tih mi leh amaha innghat tlat mi tan chuan malsawmna a lo ni ta zawk a ni. Ringtu nih hlawkna chu he leiah ngei pawh hian a tel theih a ni.

■ ■ ■ RIMAWI

ZAIPAWL LEH ZAIPAWL RAWNGBAWLNA

— Pastor Lalawmpuia,
Phainuam

Thuhmatheh :

Zaipawl rawngbawlna sawifiah tak tak tur chuan kan hun leh hmuniin a daih hauh lovang. Chuvangin tun tum hian zaipawl rawngbawlnaa kan hman nghal mai theih leh pawimawh zualpui chauh kan tarlang ang. Presbyterian kohhran chuan kum 1953 atang khan zaipawl nghet kan nei tan a ni.

Zaipawl chu eng nge ni?

Zaipawl han tih hrim hrim hi a bikin Kristiante zingah chuan a mikhual lo hle a. Khawvel zau zawkah pawh kohhran tinten an neih tlangpui a ni. Khawvel lam zaipawl a awm bawka. Tun tumah hian kohhran zaipawl bik kan sawi dawn a ni. Kohhran zaipawl hian thawnthu/chanchin (history) thui tak a nei a. Thuthlung hlui hun lai atangin kan hmu tawh a ni (1 Chro 25) Kristian hmasaten an Pathian biakna hmun Synagogue-ah an chhawm zel a. Kum zabi laihawl (Middle Age) hun lo inher chhuakah pawh Pathian biakna hmanraw pakhat angin inkhawmna hmunah hmun pawimawh tak a chang chho zel a. Reformation period-ah phei chuan

zaipawl hmanga rawngbawlna hi kohhran paten an dah pawimawh hle tawh a ni. Tichuan zaipawl chu Pathian chawimawi duhna rilru kohhran hoten kan neih/put theihna tura mi eng emaw zat kohhranin a rem khawmte an ni.

Zaipawl rawngbawlna:

Zaipawl rawngbawlna tih chuan a huam zau deuh avangin Mizorama Presbyterian-ten kan hriatthiam dan leh zim deuh hlekin sawi tum ila a tha ang.

Martin Luthera chuan, "Theihpatawpa zaipawlten an theihna zawng zawng an hlannaah chuan Pathian thatzia leh ropui zia a hmuh theih a ni," a ti hial a ni. Chuvang chuan zaipawl rawngbawlna hi tih mai mai leh dan angleka ngaih chuan zaipawl nihna tak kan kalsan thui hle a lo ni.

Heti zawng hian sawi ta ila, miin Pathian thu a sawi chuan emaw, Pathian thu sawitu kal tlangin Pathian leh mihring (thu ngaithlatute) an indawr thei tur a ni. Amah kaltlangin Pathian leh mihring (ngaithlatu) te an inpawl (fellowship) thei tur a ni a, zaipawlte kal tlangin Pathian ropuizia kan hmu thei tur a ni. Hei tak hi a ni Martin Luther an a ngaih pawimawh em em chu.

Rabbi Abraham Joshua Heschel chuan a lehkhahu "The insecurity of Freedom" ah chuan "Zaipawl chuan a thiamna (zai thiamna) kohhran hmaa va tar chhuah (in showoff) a tum tur a ni lo va, zaipawl bik tan ang chauha

va ding chhuak pawh a ni hek lo, kohhran aiawhin Pathian a be/dawr dawn a ni zawk. Kohhran ho rilru hruaiin a la ang a, a hneh bawktur a ni. Zaipawl a hna chu kohhran hote an zai hmangin Pathian nen min inhmachhawntir thei tur a ni a, kohhran hote rilru chu Pathian chawimawi rilru nei thei turin min hruai tur a ni", a ti. Kan sawi vek seng lo ang. Heng tlem te atang ringawt pawh hian zaipawl rawngbawlna pawimawh zia kan hmu thei awm e.

Zaipawl rawngbawlna pawimawh tak mai chu kohhran ten Pathian kan faka kan chawimawi theihna tur atana hmahruaitute an ni.

Zaipawl member-te rawngbawlna pawimawh em em chu zai hmanga/hla hmanga Chanchin Tha puan darh a ni. I Korinth 14:15-ah chuan "Hriat theihna pawhin ka sa (hla) bawktang tih kan hmu a, a hma lam kan chhiar chuan Chanchin Tha puanna kawnga thil chi hrang hrang tawngghriatloh te a sawi a, hriat theih ngeia Pathian fakna hla sak chu tawngghriatloh te ai pawn Chanchin Tha puan darh nan a tha zawk a ti a ni.

Zaipawl te rawngbawlna pawimawh em emna chhan dang leh chu Pathian ropuizia leh Lalzia tarlan hi a ni. Sam 69:30-ah chuan "Pathian hming chu hlain ka fak ang a, lawm thu sawiin amah chu ka chawimawi ang" tih kan hmu a. Hla hmanga chawimawi hi Pathian lawm zawng tak a ni. Lal

Davida hian Pathian ropui zia leh makzia sawi chhuah/tarlan a tum reng reng chuan hla hmangin a chawimawiin a fak thin a ni. Sam bu kan chhiar chuan chutianga hla hmanga chawimawi tur a nihna tam takkan hmu a ni. A bikin Mizote ngat phei hi chu kan hlimna vawrtawp leh lungngaihin hla hmanga inawi tlei thin hnam kan ni.

Khawvel thil ang pawn hlawhtlinna kan chan chang pawn hla nena lawm thin kan ni a, lungngaihna, thihna hial kan tawh chang pawn kan inhnem theihna turin 'khawhar hla' tam tak kan nei a ni.

A bikin thihna kan tawh changa sak tur hla tha tak tak kan nei hian a entir chian em em chu 'hla hmangin Pathian awmpuina, Pathian thlamuanna' kan dawng thin tih hi a ni. Chuvang chuan zaipawlten hla hmangin Pathian an fak thin a, an chawimawi thin a, chu an hla sak hmang chuan kohhranten Pathian ropuizia kan lo hmu fiah thei thin a lo ni.

Zaipawl member-te hriat tur :

Zaipawl rawngbawlna pawimawh zia kan tarlang tawh a, chutiang taka pawimawh a nih vang chuan chu zaipawl member-te dinhmun chu a pawimawh hle tih a ti Chiang a, ruat avang maia member nih ve te, inpek avang maia member nih ve satliah ringawt chu a tawktlo hle tih a lang a ni. Zaipawl member chuan Pathian rawngbawlna pawimawh tak a ni tih a hre Chiang hle tur a

ni. Zaipawl member chu zaithiam satliah ringawt a ni tur a ni lo a, in pekna tak tak a ngai a ni. Zaipawl member-ten kan hriat ngei ngei tur tlem lo tarlang leh ilangin.

- a) Zaipawl member chu mi piangthar dik tak a ni tur a ni.
- b) Zaipawl member chuan Pathian kohna a ni tih a chiang tur a ni.
- c) Zaipawl member chuan a zaithiam avang ngawta ruat (mahni inpe) a ni lo va, Pathian rawngbawl na a ni tih a chiang hle tur a ni.
- d) Zaipawl member chuan rawngbawl na fawng pawimawh tak chelh tih hriain a nun a ulukin a fimkhur hle tur a ni.
- e) Zaipawl member chu mi insum thei mi, zukleh hmuamah fihlim a tum tur a ni.
- f) Rawngbawl na neih dawn reng rengin tisa lama inbuatsaih na (hla zir etc.) pia h lamah thlarau lamah thei tawpin a inbuatsaih thin tur a ni.
- g) Hla zir dawn leh rawngbawl na neih dawn reng rengin a hun taka hlen chhuak turin a inbuatsaih thin ang a, a tlai mai mai tur a ni lo.
- h) Zaipawl member chuan hla an va sak ringawt hun ni lovin inkhawm hun pum ngaih pawimawh nachang a hre tur a ni.
- i) Zaipawl member-te chuan an hla sak turin a sawi tum tak a hre chiang em em tur a ni.
- j) Zaipawl member chuan a member-puite a zahthiam hle ang a,

an tlin lohna a hmuh pawn zaipawl huangah bak chuan a sawi tur a ni lo.

- k) Rilru inhawng (open-minded) a nei ang a, rawngbawl na atana hlawk tur a ngaihtuah chhuak thiam tur a ni.
- l) Zaipawl member chuan kohhran member dangte tel ve chakna khawpin a rawngbawl na a hlimpui tur a ni.
- m) Zaipawl member chuan hotute zilhna a ngai pawimawhin zawm ngei a tum tur a ni a, hauhin a thinrimin a tau mai mai tur a ni lo.
- n) Zaipawl member chuan zai chauhah ni lovin kohhran rawngbawl na peng hrang hrangah hman tlak ni tur khawpin hma a sawn ngei ngei tur a ni.

Tlangkawmna :

A tir lama sawi ang khan zaipawl leh a rawngbawl na hi wawi khata sawi vek sen a ni lo va, heng kan tarlante hi chu a pawimawh zual tak tak chauh a ni. Kan sawi tawh ang khan zaipawl hi kohhran hmasate atangin waviin thleng hian a pawimawh em em a, kohhran hi a tawp a nih ngawt loh chuan a la pawimawh telh telh pawh ring ila. **Heti khawpa pawimawh kohhran leh Pathian rawngbawl na zaipawla tel ve theia kan awm ringawt mai pawh hi lawmna chang i hria ang u♦**

■■■ HRIATZAUNA

HRIAT ATANA THA

— V.L.Zaithanga

Thalaite dinhmun:

- Khawvel-a mihring 50% chu thalai kum 25 hnuai lam an ni.
- 90% kum 18 hnuai lam za zela piangthar
- 95 kum 25 hnuai lam za zela piangthar.
- 1/10,000 kum 25 leh 35 inkar piangthar.
- 1/50,000 kum 35 chung lam piangthar.
- Mi pakhatin kum 70 chhung hun hman dan a chhut chhuah:

	Kum	%
Mut hun	23	32.9
Hnathawh hun	16	22.8
TV en hun	8	11.4
Chaw ei hun	6	8.6
Zin hun	6	8.6
Hun awl	4 ½	6.5
Dam loh hun	4	5.7
Inchei hun	2	2.8
Sakhaw lam	½	0.7
	70	100 %

- **TUI** : Khawvel (Lei) hmun thuma then hmun hnih hi Tui a ni. Sai taksa-ah tui 80%

A lu-ah Tui 78%

■ **BIBLE:**

Hming	Bu	Bung	Chang	Thu mal	Hawrawp
Thuthlung Hlui -	39	929	23,214	5,92,439	27,38,100
Thuthlung Thar -	27	260	7,931	1,32,253	9,33,383
Belhkhawm:	66	1,189	31,145	7,24,692	36,71,438

Ni tin bung 3 vel chhiarin kum khat chhungin Bible a chhiar chhuah theih.

Tomato-ah Tui 90%

Thing kung-ah Tui 60%

- **SEX** (mipat-hmeichhiat) hman chungchang :

"Pawlawh taka sex hmang mai maiho zingah chuan mi dang rinna te, inpawhna te a awm lo va, hei hian a hnu zelah harsatna mi dang nena inkarah a siam thin."

- David Walsh, National Institute on Media and the Family, USA.


USA-a Researcher-ten an chhui danin : Hmeichhia, kum 16 vel an nih laia an virginity (thianghlimna) hlohte

chuan pasal an neih hnuah inthen an awlsam bik. Hmeichhia teenagers (tleirawl) an nih laia vawi khat atan sex hmang ho chu pasal an neih hnuah 30 % chu an inneih atanga kum 5 velah an inthen leh, 47% vel chu a hnu kum 10 velah an inthen leh bawok.

Teenagers (tleirawl lai) nih laia sex hmang miah lo chu pasal an neih atanga kum 5 velah 15% vel chauh an inthen.

Sex a hun hmaa hmang duh lote chuan Mental Health (Rilru Hriselna) an nei tha bik. Hmeichhe zingah phei chuan rilru natna/buaina kum 40 an tlin hnuah pawh an nei tlem.

"Tleirawl hun laia sex-a inhmang nasa hmeichhiate chuan rilru lamah harsatna thuk tak an nei a, mahni inhmuhisitna te, hlutna nei lo leh eng mah ni lova inhriatna te an nei duh bik." - Dr. Meg Meeker.



KANTU

Ramhlun East Br.

RAMHLUN EAST BRANCH

Kristian Ṭhalai Pawl, Ramhlun East Branch hi March ni 15, 2010 (Thawhtan) khan din a ni a, Ramhlun North Kohhran aṭanga indangin kumin 2013-ah hian member 341, mipa 214 leh hmeichhia 127 an awm mek a ni.

Group pathum Isaia Group, Jeremia Group leh Daniela Group tein an inṭhen a. Sub-Committee pali- Programme, Evangelical, Property and Decoration leh Refreshment committee te an nei a. Branch an din tirh aṭangin kar tin chhuak chanchinbu KṬP Tlangau an chhuah a, copy 250 an sem chhuak ṭhin. Kristian Ṭhalai Chanchinbu hi copy 123 an la mek baw.

Nikum chung khan budget Rs. 2,80,000/- an nei a, Rs. 4,49,221/- an thawk chhuak a, Kohhranah an sum hmuh aṭangin Rs. 1,01,000/- an chung lut a ni. An sum hmuhna tlangpui - Faith Promise, inkhawm thawhlawm, Blanket suk, Hoarding siam,

Leirawhchan rem, Lei ṭha thiar etc. te a ni. Biak In sa lai an ni baw a, ṭum eng emaw zat Biak In sak hnatlang an nei baw.

Thla tin thawhlehi zan hmasa berah Branch committee an nei ṭhin. Kum kalta 2012 khan Thawhtan zan inkhawm hi 31.14% a ni a. Sermon, short sermon, sharing, Group Nite leh Central KṬP Kumpuan thupui zir nan te hun an hman ṭhin. Pathianni Sunday School banah ṭawngṭai inkhawm an nei ṭhin. Thla tin Pathianni vaw hnih na tlaiah chaw nghei ṭawngṭai an nei ṭhin a, thawhtan zan inkhawm ban apiangin member hlate pualin ṭawngṭaina hun an hman ṭhin baw. Central leh Bial KṬP aṭanga tih tur programme awmte an tihlawhtling thei zel baw.

Kohhran kal tlangin missionary pahni an chawm mek a, an branch member mi pakua (9) SMB hnuaiah missionary-in an thawk mek a ni. An member missionary-a chhuak te Kristian Ṭhalai Chanchinbu an lak sak a. Kumin hian hmachhawp lian

tak Fehchhuah/Work camp an nei mek a ni.

Kumtluanin Kohhran zaipawl tha tak an nei thei a, Thawhtan zan inkhawm ban hi hla zirna hun nghet atan an hmang. Member-te intih tlangnel tawn nan leh inpawh zawk theih nan KṯP Sport/Week an nei thin.

An member chatuan ram pan an awmin hun remchang hmasa berah Branch Committee leh a awmna Group hruaituten an chennaah kalin ralna hun an hmang thin a, ralna thilpek Pathian Lehkhabu Thianghlim an pe thin. 2012 chhungin member thi an nei

lova lawmawm an ti hle. Member Biak In hawnga nupui/pasal nei an awmin lawmpuina thuziak (frame sa) leh Rs. 500/- an pe thin.

Central KṯP-in Blood Donation Calendar a siam angin Civil Hospital-a hman turin thisen an pe a. Nikum khan Branch leh Group hruaitute Intuaitharna zan hnih riakin an nei a, Rev. Rosiamliana Tochwawng, Lecturer, ATC-in Bible Study a neihpui a, Speaker-ah Upa C. Ngurthantluanga, Khatla an hmang. Central KṯP hruaitute leh Synod Zaipawlten an sawm angin an Branch an tlawh thei a, lawmawm an ti hle♦



■ *Pastor pakhat hian sual chungchang thu hi thiam tak maiin a sawi a. Kohhran hruaitute chuan an ngaithei ta hauh lo mai a, "Khatianga i sawi chuan tute nge sual lo awm ang? kan thalaite nun a khawloh phah thei mai ang asin! Ka sawi sual palh a ni tiin sawi leh la a tha ang," an rawn ti a. Pastor chuan a dawhkana bur pakhat hi a lo kawok a, "He bur chhungah hian tur a awm a, a tuamnaah pawh 'tur' tih a inzhiah hi. Hei hi ka tuam hnan anga, damdawi ei nuam deuh zawok hming ka ziaik mai dawn em ni? Tur a nih hriaa ei ngam lovin damdawi hming a inzhiah avangin rawn ei ta se eng thil nge thleng ang le? A thihphah mai dawn asin! Sual na na na chu eng ang pawhin chei mawiin tuam mawi mah ula sual a ni tho tho," a lo tih khum ve hmiah.*

■ *Sir Michael Faraday, Scientist ropui leh Kristian tha tak mai chu thih ngamin a na a, chanchinbu mi pakhatin a va kawm a; thih hnu lam a suangtuah dan a zawt rawk mai a. Ani chuan, "Suangtuahna a? Suangtuahna ka nei lo reng reng, thil Chiang takah ka innghat tlat a ni. Ka tlantu hi a nung tih ka hria, AMAH chu a nun avangin kei pawh ka nung ang," tiin a chhang.*

— Gospel Trumpet

Keimahni



■ November 13, 2012 (Thawhlelni) khan Reiek Kohhranah Bial huap Leadership training neihpuiin T. Upa Lalhruaizela leh Pu Lalmuanpuia Hrahsele te an kal a, training-ah hian mi 34 an tel a ni.

■ **Kohhran Upa-ah thlang** : January ni 13, 2013 (Pathianni) khân Dr. Samuel Vanlalhlhanga, Asst. Leader, CKTP chu Luangmual West Kohhran Upa atân thlan tlin a ni a. January ni 20, 2013 (Pathianni) khân Pu Lalhruaizela, Committee Member, CKTP chu Ramhlun North Kohhran Upa atân thlan tlin a ni baw. Kan lawmpui a, an rawngbâwl zêlna tûrah duhsakna kan hlân e.

■ Synod Executive Committee in Synod Office-a Coordinator-te hna chanvo a siamrem angin January thla ațang khan Coordinator 7-te chu an awmna tur Department-ah an awm fel ta a. Upa Lalrinmuana, KTP General Secretary ni thîn chu Synod Mission Board-ah awmin Upa Zonunmawia, Synod Information a mi chu KTP-ah General Secretary thar atan a lo awm ta. General Secretary chhuak ta leh tharte duhsakna kan hlân e.

■ Central KTP Committee 645 : IV(3) of 13.12.2012 chuan 2012 - 2014 term (December 18.2012 ațanga 2014 General Conference thleng) Mizoram Synod Choir Conductor turin Pu Lalchamlia, Mission Vengthlang chu a ruat thar. Tin, Bass part an indaih loh deuh avangin Pu Lalrinthanga Sailo, Melthum chu a ruat thar baw a ni.

■ Kum 2013 January thla ațangin Kristian Thalai lak man kum khatah Rs. 50/- ni thîn chu Rs. 60/- ah tihsan a ni ta a. Chanchinbu man pek chungchangah a man tihsan hi hre lo kan awm avangin a man pe tur chuan bu khat Rs. 60/- hisapa pek tur a ni e.

Chanchinbu hi lak belh duh kan awm chuan hriattir reng theih kan ni baw e.

■ Bial Report 2012 February 5, 2013 (Thawhlelni) aia tlai lovah Central KTP Office-ah theh luh tur tih kha la theh lut lo chuan a rang lama theh luh ni se. Central KTP dinhmun dik tak kan hriat theih nan report hi a pawimawh avangin i ngai pawimawh ang u.

CENTRAL KṬP COMMITTEE, 2012-2014

Leader	:	Rev. Lalrinmawia	9436384423
Asst. Leader	:	T Upa Dr Samuel Vanlalthlanga	9436362173
Gen. Secretary	:	Upa Zonunmawia	9436152024
Asst. Secretary	:	Tv. V.L. Muanchhiana	9862976771
Treasurer	:	Upa Zothangzuala Chhangte	9436152841
Fin. Secretary	:	T.Upa Zohmangaiha	9862018161

Committee Members

Pu R. Lalhmingthanga	9436152362	T Upa Lalhruaizela	9436156832
Pu Vanlalthruaia	9436146913	T Upa Pu Lalramdina Ralte	9436360865
Pu Lalnghinglova Hauzel	9436141979	Pu Saizamlia Sairo	9436148727
Dr. H. Lalthanzara	9436195549	Pu Lalmuanpuia Hrahse	9436196968
T Upa Lalremsiana	9774725710	Tv. R. Lalramnghaka	9436351374
Pu Samuel Laldinglana	9436198740	Dr. Lalliansanga	9612241873
Tv. R. Lalruatkima	9436360571	Dr. Julie Remsangpuia	9436142235
Pu Lalmuanpuia	9436142398		

Ex-Officio members

Rev. Lalramliana Pachau	-	Synod Moderator
Rev. H. Lalrinmawia	-	Synod Secretary (Sr)
Rev. Lalzuthanga	-	Executive Secretary, i/c KṬP

(Keimahni chhanzawmna)

■ KṬP Kum Puan Film Intihsiakah Film 23 thlehluh a ni a, KṬP Rorel Inkhawm Lungleiah result puan a ni ang.

■ Central KṬP Leader Rev. Lalrinmawia chu Maubawk Bial aṭangin Kulikawn Bial-ah a insawn a, January 13, 2013 (Pathianni) khan induction neih a ni.

■ December 20, 2012 (Ningani) khan Central KṬP Committee vawi 645:IV(6) -in a rel angin a hnuaia Home hrang hrangte hi Chhawmdawlina Pual thawhlawm tlingkhawm aṭangin ṭanpuina hetiang hian pek an ni:

1. Ṭawngṭai Bethel Camping Centre : Rs. 31,434/-
 2. TNT Camp : Rs. 30,000/-
 3. Hermon Children Home : Rs. 20,000/-
 4. Central Jail : Rs. 10,000/-
 5. Grace Home : Rs. 10,000/-
- Grand Total : Rs. 1,01,434/-

(Cheng nuai khat sangkhat zali sawmthum pali chiah)

■ Kum 2013 January thla aṭangin Kristian Ṭhalai lak man kum khatah Rs. 50/- ni ṭhin chu Rs. 60/- ah tihsan a ni ta a. Chanchinbu man pek chungchangah a man tihsan hi hre lo kan awm avangin a man pe tur chuan bu khat Rs. 60/- hisapa pek tur a ni e.

Chanchinbu hi lakbelh duh chuan hriattir reng theih a ni bawk e.



November 13, 2012 (Thawhlehi) khan Reiek Kohhranah Bial
Leadership Training neih a ni a, Pu Hruaizela leh Pu Muana ten
an hmanpui



Kantu - Ramhlun East Branch



CKTP General Secretary thar
Upa Zonunmawia
CHANCHIN Phêk 23-na